

四庫全書

史部

欽定四庫全書

平定準噶爾方略正編卷五十九

乾隆二十三年七月甲辰

靖逆將軍雅爾哈善等疏奏賽里木回衆歸誠
沙雅爾回衆乞降

雅爾哈善等奏言臣等前奏賽里木城回人阿
瓜斯伯凱將霍集占所用之伯克阿里擒拏先
解送伊子圖爾都錫到營六月二十九日據沙

勒達朗卡倫官兵報稱回衆五百餘戶已至隨
派侍衛寧古禮等同貝子玉素富前往照看收
其軍器安插於大營東十五里邨莊復遣散秩
大臣鄂對等接應至營臣等令阿瓜斯伯凱等
入見據稱霍集占領兵來援派我賽里木城出
兵一百名隨行又聞欲將我等家屬移於阿克
蘇衆俱不願乘阿里不備於夜間持挺擊仆其
助惡四十餘人除殺死二十九人外餘俱解送

來營等語復詢同來回衆俱稱賽里木原有五
千餘人被霍集占殘害損大半今願舉阿瓜
斯伯凱為伯克臣等派護軍校瑚圖禮等將伯
克阿里解京又據沙雅爾城舊伯克瑪哈默第
遣其子阿三和卓來報聞將軍等擒獲喀啟巴
巴克並未殺害久欲投誠近因霍集占新用之
伯克阿布勒什木挈眷潛逃是以同心歸順如
大兵前進則城鄉回衆無不帖服等語臣額敏

和卓等俱知阿三和卓家世語其來降屬實臣等加以撫賞派玉素富瑞濟布等領兵前往奏入報

聞

靖逆將軍雅爾哈善等叅奏副都統順德訥疎脫霍集占

雅爾哈善等奏言臣等於六月十六日擊敗霍集占等來援庫車賊衆有賊數百人被我兵截

往沙雅爾當有卡倫兵報知順德訥言昏夜如
何追賊且俟天曉至今早派兵前往臣等即催
順德訥作速接應順德訥仍稱有面稟臣等之
言策馬向軍營而來臣等又令侍衛齊努渾迎
往催督始領兵前追二十五日午刻回營告稱
追至鄂根河賊衆已渡據橋為壘以鎗礮防守
天曉看賊踪跡向賽里木阿克蕪逃去我兵追
逐三四十里力不能及等語臣等正欲叅奏適

沙雅爾回衆投誠據回人阿三和卓告稱霍集
占來援庫車為大兵擊敗截斷逃入城中我沙
雅爾亦有數人同入六月二十四日逃回告稱
霍集占於十六日入城十八日出戰被傷二十
三日率四百人出西門渡鄂根河選精騎百餘
由戈壁逃走不知所向餘俱潰散等語查順德
訥疎脫賊衆違悞軍令罪無可逭謹合詞叅奏
現在軍營領隊大臣甚少擬將巴圖魯侍衛寧

古禮總管扎爾善協領薩斯泰暫行管理請發
領隊大臣二員前來以備委用奏入

上諭軍機大臣曰雅爾哈善等叅奏順德訥疎防致
霍集占等兔脫又不急往追擒真怯懦昏憤之極
順德訥著革職以兵丁効力此舉雖順德訥罪無
可逭雅爾哈善等身為將軍叅贊大臣所司何事
獨無罪乎今渠魁遠遁朕亦無可訓諭惟督策兆
惠速往協助雅爾哈善等能從此奮勉一面攻圍

庫車一面追擒霍集占尚是自贖之路否則惟有
按律治罪而已昨雅爾哈善奏稱賽里木回人阿
瓜斯伯凱率屬來降著賞戴孔雀翎及大荷包一
對小荷包四個緞四端仍傳旨慰撫以安新附所
舉侍衛寧古禮總管扎爾善協領薩斯泰等俱著
暫行領隊効力

諭叅贊大臣納穆扎爾三泰等速赴庫車軍營

上諭軍機大臣曰雅爾哈善等奏請派出大臣二員

前赴軍營等語可傳諭納穆扎爾三泰前往庫車
約於何時可抵軍營即計日具奏近因順德訥等
疎脫逆酋霍集占看來雅爾哈善調度乖方深負
委任現在傳諭兆惠速往辦理納穆扎爾等其奮
勉協贊以奏膚功

諭定邊將軍兆惠速往辦理回部

上諭軍機大臣曰雅爾哈善叅奏順德訥疎脫霍集
占深為可惜可恨伊等無福成功將自來送死之

賊任其免脫尚可委用耶今征回一事全付之兆
惠矣前已諭兆惠速赴回部此時或從造哈嶺或
從博登嶺前往皆可若已抵庫車即由彼進兵將
庫車令雅爾哈善駐守至此次縱賊之罪雖由順
德訥然雅爾哈善哈寧阿身為將軍及叅贊大臣
豈能委過他人脫身事外除將伊等嚴加議處外
兆惠即訊問順德訥如縱賊情實即於軍營正法
示衆若有別情應叅奏者即嚴行叅奏此旨尚未

頒發俟兆惠奏到再行宣布并以朕旨傳諭額敏和卓伊係回人雖與雅爾哈善等不同亦不得謂為無過念其素能出力姑從寬貸用觀後效即在兆惠隊內行走

乙巳

命革雅爾哈善哈寧阿職以叅贊大臣尚書納穆扎爾為靖逆將軍侍郎三泰為叅贊大臣

上諭軍機大臣曰逆賊霍集占逃脫一事雖順德訥

之罪然雅爾哈善哈寧阿等所司何事伊二人深
負委任俱著革職以兵丁効力靖逆將軍員缺著
納穆扎爾補授叅贊大臣員缺著三泰補授納穆
扎爾三泰奉到此旨速往庫車接印辦事將雅爾
哈善交與永貴令在屯田處効力再前此擊敗賊
衆或向鄂根河逃去或被截入城雖不知霍集占
所在然所奪之纛業經認識自當從此根究且霍
集占入城後又親身出戰敗而復入其情形自異

尋常乃雅爾哈善等至此尚云不知可見伊等並未親履行陣著納穆扎爾等詢問所護回纥係從何處奪取即行奏聞已諭兆惠速往庫車此時霍集占既已逃脫則逆黨阿卜都克勒木亦必同逃所留之人量無關緊要雅爾哈善應已得城矣納穆扎爾等惟以擒獲霍集占為要著傳諭知之

申諭定邊將軍兆惠等辦理回部事宜

上諭軍機大臣曰雅爾哈善等縱賊債事已諭兆惠

速往庫車今草雅爾哈善職發往屯田處効力以
納穆扎爾為靖逆將軍但辦理回部仍於兆惠是
賴可傳諭兆惠從前命伊來京特以雅爾哈善尚
可驅策今失機若此自不得不委之兆惠兆惠勿
因久在軍前遂生懈怠雅爾哈善即其前鑒也朕
委用大臣再三審慎一經付託即望其成功豈肯
輕為更代至不得已而治罪皆其自取夫豈初心
兆惠知此惟一意奮勉早為竣事即今之第一功

臣也若馬匹疲乏現在庫車軍營駐牧者可以調換乘騎至兵丁口糧則回地秋禾正熟而巴里坤吐魯番等處又俱陸續轉運無虞匱乏且我兵未進各城回衆已遠來送款則軍鋒所至伊等自將霍集占擒送如波羅泥都伯克霍集斯等見霍集占窮蹙縛獻自贖俱令其入覲再酌量辦理至兆惠若先抵庫車不必更候納穆扎爾即收雅爾哈善印信訊問伊等情節如順德訥縱賊是實即正

法示衆倘有別情或彼此相訐即將雅爾哈善哈
寧阿順德訥拏解來京一面帶兵前進其靖逆將
軍印暫交明瑞署理俟納穆扎爾到日仍趲赴兆
惠軍前併傳諭納穆扎爾等知之

御前侍衛敦察等疏奏索倫兵起程日期

敦察等奏言臣等自京起程六月十三日至齊
齊哈爾據將軍綽爾多已將前派索倫兵一千
名整裝待發其添派索倫兵一千名據總管羅

爾博岱等照例揀派整裝臣等於二十九日至
海拉爾七月初五日官兵俱集副都統福祿等
亦於初六日到來臣等於初八日帶領起程奏
入報

聞

丙午

諭叅贊大臣富德等查拏哈薩克錫喇

上諭軍機大臣曰富德奏稱與兆惠分兵過吹塔拉

斯至西哈薩克邊界索取哈薩克錫喇如稍有推
諉即領兵入境查拏或實係逃往他處亦即通行
搜捕等語所辦深合機宜看來富德有承受朕恩
之福近據兆惠奏糧運章京托克托拜曾遇哈薩
克額爾類問及哈薩克錫喇逃往何處而巴祿奏
稱阿布賚使人哈奈巴圖爾謂哈薩克錫喇向沙
喇摩勒逃去叅互觀之哈薩克錫喇似不曾逃往
特柳克處或藏匿幽僻亦未可定可傳諭富德伊

能擒獲哈薩克錫喇則厄魯特全部可告成功其
悉心奮勉以膺懋賞

定邊將軍兆惠疏奏東布魯特歸誠

兆惠奏言六月二十三日據遣往布魯特塔拉
斯之侍衛托倫泰告稱招服霍索楚鄂拓克頭
目邁塔克啟台鄂托克頭目喀喇博托等途中
遇叅贊大臣富德設宴相待因喀喇博托年百
餘歲兩目失明邁塔克年已望七亦難行走邁

塔克遣其弟舒庫爾喀喇博托遣其姪哈畢啟
來至軍營臣令其入見據哈畢啟等跪稱我布
魯特分左右翼右翼係瑪木特呼里管領左翼
係喀喇博托管領霍索楚啟台兩鄂拓克各有
千餘戶情願歸誠

聖主遣我等入

覲等語臣等加以撫慰即派托倫泰等於本日伴送
起程奏入報

聞

叅贊大臣巴祿疏奏途遇哈薩克解送叛賊布庫察罕和碩齊

巴祿奏言臣於六月二十一日從古爾班察爾河起程巡查臺站途遇哈薩克阿布賚遣來貿易之哈鼐巴圖爾等據稱聞得布庫察罕投入哈薩克六月初有拜布喇克巴圖爾等將布庫察罕交與大國來使又聞哈薩克錫喇逃往沙

喇嘛勒舍楞投入俄羅斯等語臣即送哈奈巴圖爾於策布登扎布處二十六日獎賞藍翎德倫保解送布庫察罕和碩齊前來據稱同納旺等於五月二十九日至哈薩克達勒達克之拜濟格特據拜布喇克巴圖爾告稱布庫察罕同妻子屬人來投今奉將軍等索取即同伊妻交出又據霍集伯爾根屬人兆巴薩爾等將在逃原任散秩大臣和碩齊交出又前次得傷之察

哈爾跟役孟克索倫披甲薩尼圖俱行交送我
等起程前來納旺雅庫等仍往阿布賚處查詢
哈薩克錫喇信息其布庫察罕之子年方七歲
已分給遠地俟續行查送等語又接策布登扎
布知會將布庫察罕解送軍營再由烏里雅蘇
台送京并詢據和碩齊供詞另單恭呈

御覽奏入報

聞

丁未

諭定邊左副將軍成衮扎布等嚴行拏解和碩齊

上諭軍機大臣曰據巴祿奏稱途遇哈薩克人等解
送叛賊布庫察罕和碩齊已派兵送往策布登扎
布處等語可傳諭成衮扎布解送賊人必經由成
衮扎布駐劄之地閱和碩齊供詞頗多狡辯若策
布登扎布誤信其言不與布庫察罕一體鎖拏成
衮扎布即嚴行拏解勿致逃脫若此時已至布延

圖亦傳諭扎隆阿等遵照辦理

戊申

飭諭雅爾哈善等効力贖罪

上諭軍機大臣曰雅爾哈善等疏脫霍集占朕已降旨斥責令其効力自贖今思霍集占冒死入城必因同惡之人勢須救拔迨計窮力竭夤夜脫逃亦必與逆黨同行城內所餘不過老弱無能之輩賊尚不甚愛惜我何為盡銳攻取惟揀派精兵務獲

賊首以贖前愆又

諭曰今逆賊霍集占計窮力竭乘此機會各城讐服
必有擒獻賊首者朕思兆惠納穆扎爾尚在遘行
若雅爾哈善等能進兵擒獲霍集占尚可贖罪是
以仍諭其作速進兵兆惠納穆扎爾等不可因有
此旨遂疑為姑從寬貸雅爾哈善此次失機非尋
常可比果能擒獲賊首兆惠等即行具奏朕當酌量
施恩否則雖得阿克蘇亦不准贖罪仍遵前旨辦

理著傳諭兆惠等知之

諭大學士管陝甘總督黃廷桂等酌量鑄造礮位

上諭軍機大臣曰據涼州將軍嵩阿禮奏稱軍營需用大礮已造成兩位送往肅州其續造兩位俟演放後再行運送等語前經雅爾哈善等奏稱內地鑄造礮位轉運艱難請將匠役物料趲赴軍營酌量鑄造朕已如所請行可傳諭黃廷桂等此時自必遵照前旨辦理但將已成礮位速送軍營可也

諭安西提督豆斌仍行搜捕逸賊

上諭軍機大臣曰前諭豆斌速往庫車與馬得勝分
管祿旗兵丁今據奏稱在哈畢爾噶圖山等處拏
獲嗎哈沁數人尚有宰桑巴拉等逃逸未獲等語
豆斌搜捕嗎哈沁等日久未見弋獲要犯既有巴
拉等在逃當悉力搜捕擒獲再遵旨前赴庫車軍
營

已酉

申諭定邊將軍兆惠進勦回部事宜

上諭軍機大臣曰昨因雅爾哈善等坐失機宜命兆惠辦理回部現在官兵圍守庫車四十餘日總由初次攻城賊既久備又恃有救援是以未易即下若持此以較各城遂有畏難之心則謬矣此次大兵所至惟據其要害之地賊衆自然畏懼如必克一城再攻一城則回部堅城尚多斷非長策可再傳諭兆惠回人素稱選懦近來屢經勦捕畏我軍

威乞降相續且伊等所保惟城而村落居人自不能兼顧若盡入城守則人衆無食亦必困殺斯時必有縛送首惡以自贖者如擒獲霍集占各城自然歸附兆惠其加意奮勉以奏膚功

庚戌

定邊右副將軍策布登扎布等疏奏哈薩克擒送布庫察罕和碩齊

策布登扎布等奏言據遣往哈薩克之納旺報

稱五月十一日至阿延庫勒遇哈薩克百餘人
詢以叛賊哈薩克錫喇布庫察罕等所在有溫
圖渾告稱在拜布喇克巴圖爾處我因通信阿
布勒比斯等令其轉飭擒送隨至博克圖哈薩
拉克溫圖渾來告已通知多羅特拜親向拜布
喇克曉示毋得疎脫二十九日至達勒達克遇
拜布喇克告稱已拏獲布庫察罕六月初一日
至拜布喇克處我等酌給駝隻緞疋伊遂將布

庫察罕交出復據多羅特拜告稱布庫察罕之
子七歲在莫倫鄂拓克之伯亨處距此甚遠已
差人往喚又多羅特拜之族弟章奇什將布庫
察罕之妻交出并情願送至軍營續有哈薩克
之兆巴薩爾將原任散秩大臣和碩齊交出令
其屬人哈勒津等押送隨派領催德倫保等解
送軍營我仍同雅庫前往阿布賚游牧探取哈
薩克錫喇信息等語臣等將布庫察罕和碩齊

訊取供詞派侍衛富寅保托和里等解送至京
臣策布登扎布即向伊犁探兆惠信息臣阿桂
暫在布空郭勒等處搜捕逸賊候成衮扎布知
會索取舍楞之信再行具奏奏入

上諭軍機大臣曰策布登扎布向哈薩克索取布庫
察罕等解京又請前赴兆惠軍營甚屬奮勉著加
恩晉封親王品級遣往哈薩克之納旺著賞戴孔
雀翎并將伊現任職銜查明具奏又所奏探取兆

惠信息前已諭策布登扎布策應富德如掣獲哈薩克錫喇固善否則於應撤兵時仍回伊犁近因回部諸城望風乞降是以朕意今歲不必撤兵以期歲事策布登扎布回伊犁後再前赴回部較為便捷所慮口糧不足又須紆道烏魯木齊若稍可通融或行文永貴等先將口糧運赴庫車接濟俱著籌酌辦理至阿桂所奏暫於布空郭勒等處駐候信息阿桂既與策布登扎布合兵自宜同往策

應當德以為効力之路何必分道却回著傳諭阿桂如未至布延圖則仍追及策布登扎布同行如已離布延圖不遠即令官兵回營阿桂作速來京請訓再赴西路又

諭曰據策布登扎布奏稱烏里雅蘇台軍營原署叅將常青察哈爾佐領署營總炳圖因疎脫盜馬賊犯等革職効力贖罪今伊等自備資斧甚屬黽勉著加恩照伊等原銜降一級將常青授為都司炳

圖校為防禦職銜俾得効力行走至所奏噶克巴
集賽之錫喇卜與瑪里格爾巴朗瑪濟克兄弟同
行因鄂哲特等拒敵敗逃即殺伊兄弟來投大兵
所掠器械衣服經厄魯特嚮導識認等語錫喇卜
現在何處著即查詢并取哈薩克錫喇信息奏聞

壬子

雅爾哈善等疏奏沙雅爾回衆歸誠

雅爾哈善等奏言前沙雅爾城舊伯克瑪哈默

第遣其子阿三和卓木乞降臣等遣王素富等
往受行至其地瑪哈默第哈爾呼勒等出城迎
接備陳從前久欲歸順為伯克阿布勒什木所
制今已潛逃始得如願王素富等詢問或願移
往庫車或仍居原地據稱現值麥熟請俟收割
後遷移隨侍衛德爾森保入城安撫計三百
餘戶男婦老弱共一千一百餘口牲隻軍器俱
造冊呈報隨將瑪哈默第等喚至軍營臣等安

撫畢示以霍集占如遣人前來即行縛送凡有
信息亦即報知臣等擬進攻阿克蘇踪其禾稼
將庫車交哈寧阿圍守仍探兆惠信息奏入

上諭軍機大臣曰據雅爾哈善等奏稱辦理降人既
畢即領兵進發想亦自知縱賊之罪且看伊等効
力如何若能擒獲霍集占則前罪皆可寬宥即不
能擒獲而能驅迫賊首不拘遁入何城雅爾哈善
即知會哈寧阿合兵圍守斯時兆惠亦必到彼威

力愈壯渠魁自必就縛再霍集占曾與庫車逆黨
約誓來援如果再來送死哈寧阿亦知會雅爾哈
善迴兵辦理至沙雅爾投誠回衆可照賽里木之
例減半賞賚仍宣朕恩旨云念爾等遠離故土不
得安生仍令於舊地駐牧並傳諭賽里木回衆知
悉或伊等畏賊聲勢不敢遷移不妨俟平定各城
後再歸故土亦可又所奏伯克托克托已為霍集
占戕害深可憫惻聞伊尚有一子著查明現在何

處奏請加恩卹廕總之此次進兵乃伊等贖罪之路據奏領兵前進究未聲明兵數若干殊屬含混併傳諭雅爾哈善等詳悉奏聞

申諭定邊將軍兆惠等察核雅爾哈善等情罪

上諭軍機大臣曰昨諭兆惠納穆扎爾有先至庫車者即傳旨草雅爾哈善哈寧阿職以兵丁効力今據伊等奏報分兵前進似已自知其罪可傳諭兆惠與雅爾哈善等會合時如霍集占就擒即以朕

旨令伊等閱看仍傳諭云若雅爾哈善等自知罪戾奮勉効力擒獲賊首則量從寬貸其傳諭額敏和卓之語仍遵前旨至伊等未到之先如哈寧阿已得庫車城兆惠即令玉素富駐守派舒赫德安撫降人及籌辦屯田事宜若尚未得城即令明瑞領兵攻取俟納穆扎爾到日明瑞仍在兆惠軍前効力行走俱著傳諭知之

癸丑

諭雅爾哈善等覆奏領兵進取情形

上諭軍機大臣曰昨據雅爾哈善等奏進取阿克蘇一摺未及所領兵數若干比即傳諭查詢今思伊等若直抵阿克蘇則中間沙雅爾等城必須安設臺站否則奏報安能迅速且沙雅爾回衆雖經歸順而大兵既遠保無變動俱應籌及陳奏設伊等因庫車久未攻克霍集占又已脫逃非遵旨領兵前進無以塞責則更恐債事著傳諭伊等據實奏

聞

申諭定邊將軍兆惠等速赴雅爾哈善軍營

上諭軍機大臣曰雅爾哈善近雖奏請分兵進取留
哈寧阿圍守庫車並未將所分兵數及安設臺站
事宜陳奏看來伊等似知疎脫霍集占之罪且聊
以奏請進兵苟延旦夕若果如此居心必至愆事
可傳諭兆惠納穆扎爾等即行馳赴仍於奉到此
旨時計何日可至雅爾哈善軍營作速覆奏

八月甲寅朔

定邊將軍兆惠等疏奏分路搜捕厄魯特餘孽
情形

兆惠等奏言臣等兵抵索勒屯薩里等處招服
布魯特人等遣其頭目分為三起入

覲隨分兵兩路臣富德向吹塔拉斯沙喇孽勒等處
搜捕厄魯特餘孽臣兆惠在特穆爾圖淖爾等
處凡可漁獵資生之地俱行搜捕又遣明瑞由

屯達什策凌占頗圖等分道前往七月初五日
據明瑞報稱自己爾呼特嶺過造哈嶺納林郭
勒烏蘭烏蘇直至大雪山麓並無一賊達什策
凌等所報亦同臣等仍分兵過庫努克薩勒古
爾班哈卜喀克等處再行窮搜近准雅爾哈善
咨文知來援庫車回衆俱已勦殺至哈薩克錫
喇雖未就擒但隻身逃遁斷不能復行嘯聚雖
使策妄阿拉布坦復生亦無可如何臣等仍在

善塔斯等處嚴行搜捕奏入得

旨近屢諭兆惠前往庫車其搜捕哈薩克錫喇專委
富德著兆惠即遵旨速赴回部以擒獲霍集占為要
駐劄布延圖叅贊大臣扎隆阿疏奏烏梁海總管
阿喇善潛逃

扎隆阿奏言七月十八日據烏梁海副都統赤
倫遣總管阿喇善之佐領圖卜慎來報阿喇善
於初六日同所領一百一十戶人口黃夜逃走

圖布慎等於次日追至扎雜達爾阿喇善將伊等綑縛行走五日始行釋放等語臣等即知會喀爾喀親王品級車木楚克扎布并派公多岳特等領兵一百名前往策應於十九日起程奏入報

聞

命定邊左副將軍成袞扎布回烏里雅蘇台辦事

上諭軍機大臣曰據成袞扎布等奏叅贊大臣阿桂

在布空郭勒等處駐兵堵截逸賊伊在都爾伯勒
津等處候信等語前命成袞扎布策應阿桂原為
追勦舍楞今舍楞已入俄羅斯阿桂亦同策布登
扎布策應富德此時諒已奉到諭旨彼處無應辦
事務著傳諭成袞扎布即回烏里雅蘇台辦事

丙辰

諭巴里坤辦事副都統阿里袞等豫備官兵口糧馬

匹

上諭軍機大臣曰昨派出察哈爾兵一千名由阿濟
必濟往烏魯木齊所需口糧馬匹應先送至烏魯
木齊豫備支給現在派出索倫兵二千名俱由此
路行走亦應照前豫備至派出健銳營兵一千名
則不必至巴里坤徑由哈密吐魯番魯克察克一
路著傳諭阿里袞或將巴里坤現有馬匹送至哈
密豫備如不敷用即將肅州牧養馬匹令伊等支
領前赴軍營亦可阿里袞速咨黃廷桂籌酌辦理

戊午

諭大學士管陝甘總督黃廷桂不必來京

上諭軍機大臣曰前命兆惠黃廷桂來京請訓會商一切事宜今雅爾哈善失機僨事朕以其不足復任仍令兆惠就近前往辦理回部今歲既不復撤兵可傳諭黃廷桂亦不必來京惟加意籌辦糧餉馬駝以給軍用

己未

諭定邊將軍兆惠辦理回部事宜

上諭軍機大臣曰適詢問回人巴巴克喀啟等據稱
附和霍集占為惡不過阿卜都瓜卜等數人及在
伊犁相從回衆其各城頭目俱不心服等語可傳
諭兆惠速往經畫務宜勦撫並用即如從前準噶
爾每年派兵擾害回人刼令歸附亦因伊犁與回
部相近若我兵如此辦理則須由巴里坤轉餉接
濟回人雖困而內地力亦難支今庫車雖似難克

但此城係回部門戶故伊等以死固守若一經攻克則諸城必潰又前據雅爾哈善請將綠旗兵調往屯田處所但攻克回城亦需防守將來增墾地畝仍于內地調發併傳諭黃廷桂等知之

申諭定邊右副將軍策布登扎布等查拏哈薩克錫喇

上諭軍機大臣曰據額駙色布騰巴爾珠爾奏對去年哈薩克額爾類搶掠昂吉岱等游牧有鄂托圖

柳之子為哈薩克錫喇所獲旋行釋放告以日後
有急即來相投等語可傳諭策布登扎布富德等
當以此言告之額爾類云哈薩克錫喇顯係投入
爾等游牧但爾等所屬頗多一時不能覺察即如
爾等屬人誤取我臺站所運官物爾即照數交還
奉旨獎賞今若獻出哈薩克錫喇則益昭恭順之
忱如此開導亦擒拏賊首之一策其籌酌行之

護軍統領努三疏奏籌辦哈薩克貿易及屯田

事宜

勢三奏言臣行至巴里坤察收豫備哈薩克貿易貨物於七月十六日抵烏魯木齊隨行知臺站官員如有哈薩克貿易人等經過即行送信續據呈報兩次經過臺站共七十餘人俱在附近貿易旋回游牧臣又咨行叅贊大臣巴祿等傳示哈薩克人等在烏魯木齊貿易日期俟遣往阿布賚處之納旺等回報再行具奏一面察

看博克達山西麓地名賽堪賽爾係布魯古特
諾海奇齊克舊游牧其地峰巒環抱水草頗饒
可養馬五六千匹亦不須多兵防護至由烏魯
木齊過嶺至吐魯番駐兵過冬處所前已咨行
叅贊大臣永貴等隨據約會同往察勘臣率道
員薩瀚等看得自己里坤至木壘九臺不堪屯
種自木壘至烏魯木齊有噶爾藏多爾濟游牧
之昌吉羅克倫等處可耕地畝十六處視其地

土肥磽水泉多寡以定工作仍令屯兵等輪替耕種以息地力方為有益計需兵六千八百名
謹繪圖恭呈

御覽再木壘濟爾瑪台等處俱有舊城基址似不必遽興工築擬俟屯田收穫一二年後再為籌酌
辦理奏入

上諭軍機大臣曰據努三察勘木壘至烏魯木齊屯田約需兵丁六千有奇繪圖呈覽屯田為軍食所

關必由近及遠以次增墾方可省餽餉而豐積貯
此時雖距耕作之期尚早自當先事籌畫可傳諭
黃甌桂於內地綠旗兵內挑選七千名調赴烏魯
木齊等處其農器即於肅州辦給交兵丁帶往或
併給以工作器具令兵丁就近伐木造屋俱宜酌
量辦理至派往回部之綠旗兵現在軍營仍需調
遣不必撤往屯田處所併傳諭永貴等知之

平定準噶爾方略正編卷五十九

欽定四庫全書

史部

平定準噶爾方略正編卷六十三

詳校官監察御史_臣孫家賢

通政使司副使_臣莫瞻菴覆勘

總校官進士_臣朱鈴

校對官編修_臣朱紱

謄錄監生_臣劉佳瑋

欽定四庫全書

平定準噶爾方略正編卷六十

乾隆二十三年八月庚申

諭定邊左副將軍成衮扎布等嚴拏搶奪臺站馬匹
賊衆

上諭軍機大臣曰成衮扎布奏稱據管臺協理台吉
瑪克蘇爾等報有賊人一起晝夜搶奪烏爾都里
克臺馬匹隨派兵前往查拏等語此等賊人敢於

搶奪臺站馬匹是否係舍楞餘黨抑或烏梁海恩克屬人若不行嚴拏何以肅清臺路著傳諭成衮扎布等加意辦理

壬戌

諭叅贊大臣巴祿等速勦哈丹阿巴噶斯等餘賊

上諭軍機大臣曰巴祿奏稱據圖倫楚達禮善等呈報追勦哈丹阿巴噶斯等餘賊至庫爾河源等處因水漲難行隨嚴飭設法渡河勦賊等語著傳諭

圖倫楚從前因敏珠爾多爾濟達禮善等未能速
殲逸賊是以派伊前往今賊踪已得又復託詞支
飾可見全未奮勉効力其作何治罪之處伊等應
亦知之現在巴祿領兵策應會同進勦其索取哈
薩克錫喇已委富德及策布等扎布巴祿惟嚴行
催督盡勦哈丹阿巴噶斯遺孽以靖地方

議撥補寧夏等營缺額馬匹

軍機大臣奏言黃廷桂奏寧夏各營摘缺之馬

四千五百餘匹購補維艱請將鄂爾多斯購解
馬四千匹留補缺額查臣等前議該督豫籌增
備馬匹奏內以該省及巴里坤現備馬三萬五
千匹來年增派官兵已足敷用其直隸等處辦
馬八千匹應准留補各營缺額嗣因方觀承奏
挑選營馬三千七百八十匹解送肅州臣等復
議令豫備來春調用更屬寬裕其將鄂爾多斯
馬匹留補寧夏各營缺額應如所奏辦理奏入

上從之

癸亥

雅爾哈善等疏奏提督馬得勝等貽誤軍機

雅爾哈善等奏言據提督馬得勝稟稱昨因大

兵久圍庫車城堅難克請於所領兵丁內選能

掘地道者令千總常繼春專管仍派副將達世

朗防賊阻截俟掘至城根將火藥填滿點放城

牆塌陷自可直前攻取遂漸次刨掘距城祇二

大餘豫備火藥期七月十九日點放不意賊人知覺於十七日夜潛出城外離城十餘丈橫掘大溝截斷以薪木填塞焚死掘地兵十名係達世朗等疎防等語查兵丁掘地距城甚近此一晝夜更當加意防範探有賊踪即施鎗礮自少疎虞今伊等並不督率巡防以致兵丁被焚至次日始知覺稟報實屬昏惰溺職又臣等前於四月至哈喇沙爾馬得勝告稱副將楊景達

報都司龔宜謙患病請暫留調理逾月未痊復
請開缺另補臣等查龔宜謙實未患病因不能
約束兵丁愧憤自行抹傷今已平復隨令查叅
仍遲延未辦六月又據報署守備陳自如行抵
玉古爾有馬兵李子雲崔文彩趙繼明步兵馬
順等竊取官銀馬駝逃走臣等令查叅該管僅
請鞭責記過又據報運送口糧兵丁二千四百
名有四百六十五名未到不知病故逃亡確數

臣等詰以沿途何不早查惟以言語支吾至所
送大神礮四位既經驗試損裂仍行充數致糜
運費且馬得勝賦性怯懦七月間有卡倫兵報
知十餘賊人踪跡即變色奔告云賊衆將近大
營請速派索倫兵抵敵軍中傳為笑談至一切
辦理事務因循含混用兵之際不可膺提督重
任謹據實叅奏請將馬得勝等革職嚴審究擬
以昭炯戒奏入得

旨提督馬得勝係領隊大員似此庸懦失誤軍機著革職所領兵丁著閔相即暫管副將達世朗千總常繼春俱著革職達世朗員缺著左秀補授副將楊景達署守備陳自如亦著革職楊景達員缺著莫倫岱補授叅將左秀員缺著王玉廷補授諭大學士管陝甘總督黃廷桂嚴緝逃兵正法

上諭軍機大臣曰據雅爾哈善等奏稱馬得勝所領綠旗兵內有馬兵李子雲等竊取官銀馬駝脫逃

又運送口糧兵丁尚有四百六十餘名未到此內
有病故逃亡未定等語此等兵丁既不能向前出
力復敢竊物潛逃甚屬不法伊等逃回內地必由
哈密安西巴里坤經過可傳諭黃廷桂行知安西
提督哈密防鎮等速行通緝仍行文伊等食糧營
汛及各本籍地方官一體查拏務獲不分首重即
行正法以肅軍紀

申諭定邊將軍兆惠辦理回部事宜

上諭軍機大臣曰昨因雅爾哈善等疎脫霍集占已
諭兆惠速往辦理回部然猶望雅爾哈善自知罪
戾奮勉思贖旋據奏報現在分兵前進是以降旨
策勵以觀後效今雅爾哈善奏據俘獲人等供稱
霍集占脫逃時曾與阿卜郡克勒木約誓一月之
內必來救援恐分兵單弱擬候兆惠到日再行前
進等語是雅爾哈善仍未進兵且叅奏馬得勝剗
掘地道為賊所覺致損兵丁罪固難追而伊等所

司何事其素無紀律可知且雅爾哈善初抵庫車
因伯克托克托中計被擒心即惶惑惟思以進兵
之事責成額敏和卓朕即降旨訓飭又所奏攻克庫
車後毀其城郭焚其廬舍撤兵回哈喇沙爾吐
魯番等處來年再行進取朕復諭以時當夏令進
兵之時遽議撤回恐衆志懈弛至得城即毀則來
降回衆於何處安插至今日所到奏摺有來降回
人供稱與二十餘人出城取草等語賊既可出城

取草則田穀何難收穫似此種種疎忽圍城復有
何益可傳諭兆惠一抵庫車即將雅爾哈善拏解
來京馬得勝失機僨事著兆惠嚴審具奏若進兵
來竟無一兵防範追逐順德訥駐兵要路固無所
逃罪而將軍此時又安在耶且我兵穴地攻城本
欲潛師取勝又何至遂為賊覺橫開一溝而我兵
轉無一知覺者甚知兵丁行竊脫逃毫無忌憚可
見軍營調度乖方全無紀律已非一日雅爾哈善

坐視賊酋竄逸頓兵城下不異守株待兔前後奏
報情詞矛盾惟圖左枝右梧始叅順德訥以卸過
繼叅馬得勝以諉咎並無一語引罪殊不思身任
元戎指麾諸將者誰之責歟此而不置之於法國
憲安在已降旨命兆惠就近前往庫車一帶辦理
回部雅爾哈善哈寧阿順德訥俱著革職兆惠至
軍營日即著拏解來京將此先行通諭知之

乙丑

命議叙搜捕逸賊之營總阿薩喇勒圖等

上諭軍機大臣曰據兆惠奏稱索倫營總阿薩喇勒圖於巴爾托輝西勒克搜勦善披領集賽賊衆百人收其馬駝軍器即係從前吉林營總兆齊等追捕未獲之賊等語阿薩喇勒圖甚屬効力著交部議叙其効力官兵及陣亡之署領催察凱等著查明送部議叙議卹又

諭曰兆惠所奏索倫領催阿丹察在阿圭雅斯山中

搜獲巴爾達穆特之嗎哈沁三人訊知藏匿累年
恐哈薩克錫喇亦似此潛身隨分兵搜捕等語查
拏哈薩克錫喇已委富德策布登扎布兆惠惟速
往庫車以擒獲霍集占為要

護軍統領努三等疏奏查勘屯田事宜

努三等奏言欽遵

諭旨會同永貴定長納世通等查勘昌吉羅克倫等
處屯田七月二十三日臣永貴等至烏魯木齊

臣努三會同查勘昌吉距烏魯木齊六十餘里
羅克倫距昌吉四十里舊係噶爾藏多爾濟之
一千六百餘戶游牧地平水足有河渠舊址修
理亦易丈量得昌吉可墾田八萬餘畝羅克倫
可墾田七萬餘畝臣等會議昌吉羅克倫各駐
兵一千五百名更番開墾種植以休地力謹繪
圖恭呈

御覽奏入

上諭軍機大臣曰努三前奏請查勘烏魯木齊屯田
時朕即謂雖為期尚早亦當先事籌備隨諭黃廷
桂來年未壘烏魯木齊屯田派兵七千名及辦給
農工器具今昌古等處既又可駐兵三千可傳諭
黃廷桂照數添派兵丁合之前派七千即得萬人
為數雖多但屯田兵惟取其習於耕作不必盡皆
精壯黃廷桂宜酌量辦理如有不便即停其添派
亦可仍與努三永貴等會商定議具奏

丙寅

諭定邊將軍兆惠等攻城不必專恃大礮

上諭軍機大臣曰前因雅爾哈善請遣工人至軍前
鑄造大礮已諭黃廷桂辦理今據奏鑄造大礮所
需工料與尋常不同微有作難之意此特所派官
員工役憚於遠行故為此說從前金川用兵兆惠
曾與其事所鑄礮位自必深知若抵庫車時應需
大礮則舒赫德亦曾往金川即委令監造然朕意

攻城不必專恃大礮當霍集占逃入庫車時圍守果嚴即無礮又豈能逃出若如雅爾哈善聽賊出入毫無防範雖有大礮亦復何用況現在穴地攻城反為賊斷皆由伊等高坐帳中以致官兵解體兆惠至彼務申明紀律一變從前疎懈之習可傳諭知之

故違軍律之索倫佐領額楞額等正法

上諭軍機大臣曰據福祿奏稱索倫總管羅爾博岱

等呈報佐領額楞額因披甲烏勒噶車私請放回
游牧見防禦托什奈患病誘其家奴巴岱頂替出
兵請將烏勒噶車照脫逃例治罪額楞額交部議
處等語額楞額徇情擅放故違軍律著即行正法
烏勒噶車著嚴緝務獲正法巴岱穿箭游營後交
與伊主托什奈管束托什奈即行首告不必科罪
餘俱如所奏行

藍翎侍衛富寅保托和里解送叛賊布庫察罕

和碩齊至京審明正法

授富寅保為三等侍衛賜號哈坦巴圖魯賞銀一百兩賞托和里銀三十兩賞級各一端遣回軍營

丁卯

諭定邊左副將軍成袞扎布等搜捕哈薩克錫喇等賊衆

上諭軍機大臣曰哈薩克錫喇雖傳聞逃入西哈薩克此時或又潛回舊游牧藏匿亦未可定可傳諭

成衮扎布現在搜勦盜竊西路納呼臺砮馬匹之
賊如無哈薩克錫喇在內即領兵至伊舊游牧於
所遇嗎哈沁等嚴密搜勦再行撤回併傳諭福祿
等帶領索倫兵經過哈卜塔克拜塔克等處將盜
竊馬匹賊人及嗎哈沁等留心搜勦祇須派兵二
三百名遣侍衛等分路前往亦不必過於留滯致
悞前抵軍營之期

察哈爾馬甲畢里克圖以親見和碩齊更衣降

賊來京質對

授為藍翎侍衛賜號圖爾根巴圖魯賞銀一百兩與
藍領侍衛賽音圖俱遣回游牧

已已

辦理屯田侍郎永貴等疏奏酌議駐兵築堡等
事宜

永貴等奏言臣等昨奉

諭旨因北惠前赴庫車所需糧餉應於吐魯番貯備

且現在徑從哈密至吐魯番令臣永貴定長二人內酌留一員駐劄辦理其運糧駝隻亦宜擇地牧放臣等查阿里衮從巴里坤運糧一千四百石已於六月起程向烏魯木齊進發隨行文阿里衮約計北惠軍營需用之數留於吐魯番其牧放駝隻詢問回人等俱稱吐魯番闢展一帶可牧駝六七十隻至貯備糧餉查魯克察克喀喇和卓吐魯番俱係回人居住惟闢展舊堡

尚係空間應請苦蓋倉廩收貯屯田所獲與巴里坤哈密運來糧餉軍械農器等件令同知都司分管再開展地居衝要自己里坤哈密及兩路軍營往來事件俱由此經過距吐魯番百餘里臣永貴定長清馥納世通內酌留二人駐劄辦事此次吐魯番截留之糧請即移貯開展又屯田各處現在築堡蓋廩派兵看守俟工竣之日續行具奏奏入報

聞

命察議辦理屯田侍郎永貴等

上諭軍機大臣曰永貴等奏稱署章京巴顏德等追捕搶奪軍需之賊因路遙馬乏回至軍營等語從前永貴等往追盜竊馬匹賊人未能擒獲今巴顏德又復如此若追賊官兵皆似此託詞支飾則臺路何時寧靜永貴定長納世通及巴顏德等俱著交部察議其綠旗千把總等員著永貴等查明懲

治

庚午

恩賞喀爾喀策卜登公品級

上諭軍機大臣曰原封喀爾喀貝勒策卜登係叛賊

青滾雜卜案內之人自應按律治罪朕因其平日

為人愚昧又年老可矜從寬革去貝勒仍准伊子

承襲今策卜登感恩悔罪抒誠入覲朕念伊在

皇祖

皇考時曾經宣力著加恩賞給公品級遣回游牧

辛未

諭叅贊大臣扎隆阿辦理擒獲烏梁海逃犯等事宜
上諭軍機大臣曰據扎隆阿奏車木楚克扎布報稱
內大臣察達克往追恩克至濟卜哈魯克獲其母
及弟婦恩克同妻子逃往蘇穆勒又公多岳特報
稱總管車根往追阿喇善等有同逃之得木齊扎
布勒岱復歸協擒阿喇善碩吹盡收其所屬等語

察達克車根甚屬奮勉効力著加恩各賞緞六端其所領兵丁効力及被傷者查明酌量獎賞擒獲之阿喇善碩吹暫行監禁俟恩克獲日將伊等所屬男丁十六歲以上者一同送京其婦人幼子即分賞察達克等扎布勒岱既悔罪復還從寬免其治罪交與該總管等約束安插著傳諭扎隆阿行文車木楚克扎布以恩旨曉示伊等知之

命賞吐魯番貝勒額敏和卓三眼孔雀翎阿拉善公

衮楚克雙眼孔雀翎

甲戌

申諭定邊將軍兆惠速往辦理回部

上諭軍機大臣曰從前雅爾哈善等以六月十六日
擊敗霍集占援兵昨據兆惠所奏俘獲厄魯特供
詞云曾隨霍集占戰敗逃入後山於七月二十四
日至特勒克等語看來伊等行走月餘特因輾轉
逃匿若我兵直抵庫車必較為迅速乃所奏但言

搜捕哈薩克錫喇尚未有速往回部之意豈以前
有往哈薩克索取叛賊亦可之諭遂爾拘泥抑或
不願前往從中觀望若如此存心避難就易則更
不可且兆惠等曾以厄魯特賊黨淨盡即策妄阿
喇布坦復生亦無可如何等語見之章奏而又借
搜捕逸賊留戀伊犁自相刺謬諒不至此此時應
接奉屢次諭旨迅速啓行矣現因辦理回部調發
健銳營兵一千名索倫兵二千名察哈爾兵一千

名軍威甚壯今年斷不撤兵且必於今冬竣事蓋
大兵一撤則回人又來奪據城堡種植禾稼惟相
持不解則賊人無從得食而我官兵糧餉馬匹又
由哈密源源接濟自可早奏膚功兆惠其加意奮
勉毋蹈覆轍

議養贍屯田兵丁等事宜

巴里坤辦事副都統阿里衮奏言雅爾哈善永
貴等議於哈喇沙爾托克三關展烏魯木齊等

處屯田兵三千六百名外再增二千四百名酌
於收穫後分往哈密巴里坤居住又哈密所設
卡倫兵多亦酌量裁撤調往屯田等語查黃廷
桂奏稱哈密有夾山路徑可至吐魯番而巴里
坤糧餉均由哈密運送應請將撤回屯兵俱於
哈密居住以節運費再哈密駐兵二千名所設
卡倫七十三處除塔勒納沁等三十二卡倫仍
須安設其餘一顆樹等三十九卡倫均可裁撤

又聽差各兵丁內亦可裁減酌於各項兵丁內
抽調六百名遣往屯田奏入得

旨軍機大臣議奏尋議屯田兵丁因耕作初興收穫
不敷養贍是以議令暫回就食俟來年佈種前
再行發往今阿里衮既稱哈密地方寬廣可以
安插且較巴里坤更省運費應如所奏辦理其
收穫穀石農工器具前已議令回人就近看守
量給口糧至添派屯田兵丁經雅爾哈善等議

於征回兵內撤回續奉

諭旨令從內地調發應俟黃廷桂等酌議至準噶爾
即經平定哈密卡倫自當酌量裁減應如所奏
將所減卡倫及聽差兵丁六百名入於屯田兵
數仍知會黃廷桂永貴阿里衮等查照辦理奏

入

上從之

丁丑

諭辦理屯田侍郎永貴等接濟策布登扎布軍營糧

餉

上諭軍機大臣曰策布登扎布奏稱在古爾班察爾
得旨前往西哈薩克策應富德詢厄魯特嚮導云
從此地須行走三個月若仍回伊犁由沙喇壁勒
前往較近約計官兵口糧可至八月等語前諭策
布登扎布策應富德如哈薩克錫喇仍未弋獲即
徑往庫車倘糧餉不敷可向烏魯木齊支給并令

行文永貴酌量辦理今據所奏則軍前口糧現須接濟可傳諭永貴等即於烏魯木齊貯備糧餉內速行運送併傳諭策布登扎布知之

戊寅

雅爾哈善等疏奏庫車回衆出降

雅爾哈善等奏言臣等攻圍庫車賊衆勢不能支八月初二日又布陣揚威遣人至城下招撫降者漸多臣等督同領隊大臣侍衛等晝夜防

範初五日夜半風雨忽作有賊約四五十騎自城東北逃出副都統順德訥侍衛德爾森保等射殺三人順德訥領兵向托木羅克追勦德爾森保向沙勒達朗追勦續有賊四十餘人自城西南衝出為侍衛富紹署營總薩斯泰察哈爾叅領索諾木等盡行勦殺又有賊十餘人自南衝出為吉林署叅領濟蘇鑑保等盡行射殺總管端濟布公朗衮扎卜侍衛富紹齊凌扎卜等

追至鄂根河集沿河卡倫兵丁扼守渡口邀截
逃賊隨據看守南門總兵閆相師送到投誠回
人五名據稱我等合城回衆早欲投誠因為阿
卜都克勒木所制未敢擅動今伊既逃去我等
情願歸降等語臣等示以明早可令舊頭目來
見次日清晨臣等至城下有舊小伯克阿濟等
將阿卜都克勒木之妻阿晒子珠勒海阿卜都
哈帕爾等擒獻即行正法又擒送沙喇斯等二

十八人自伊犁從逆回衆一百五十人臣等將
伊等罪惡傳示回衆俱即正法又阿卜都克勒
木之親兄呼爾班已被官兵射殺其妻妾亦即
正法此等已經正法賊人家口分給臣額敏和
卓鄂對阿爪斯伯凱瑪哈默第色梯巴勒氏噶
岱默特阿卜都賚等為奴通計在城回人三千
六百餘口此內有賽里木男婦一百二十四口
沙雅爾一百五十八口俱給與兩處投誠頭目

其庫爾勒四百八十五口因托克托被害仍安
挿本城居住收獲牲畜軍器暫行存貯備賞又
回人等告稱尚有助惡害人之沙泥雅斯沙珠
魯卜阿克珠勒索否呢雅斯呼爾班等五人隨
加審訊俱各服罪亦即正法示衆復派侍衛清
保柱桑古善等巡查逸賊俱有斬獲又據順德
訥遣人告稱因昏夜追賊迷踪天明見有四五
十人踪跡現在嚴追斷不空回等語臣等一面

派哈寧阿入城安撫一面料理進兵擬於八月初八日起程向沙勒達朗等處收割田麥以作口糧俟順德訥等回營即進取阿克蘇仍遵

旨令貝子玉素富領綠旗兵一千五百名回兵一百五十名駐防庫車其餘綠旗兵或暫留庫車或調往屯田請

旨遵行又與散秩大臣鄂對酌選伊勒噶爾伯克伊斯邁勒總辦庫車事務阿第勒雅科卜協辦事

務又鄂對之子鄂斯璫亦隨同辦理再臣等以伯克托克托信息詢問阿濟等據稱從前被回人拘禁霍集占入城次日即行戕害查伊子塞第克現在吐魯番公素賚璫處可否准其襲職及同行之馬英德官住等照例議卹出自

聖恩奏入

上諭軍機大臣曰雅爾哈善等頓兵庫車諸事疎懈朕即謂將來必致渠魁逃竄所留者無關緊要之

人今據奏稱阿卜都克勒木夤夜逃走舊小伯克等出降等語果不出朕所料此時伊等已經得城即應速行進兵乃必候順德訥回營殊不可解著傳諭雅爾哈善朕於伊等亦無可指示惟看其効力如何耳

申諭定邊將軍兆惠速往辦理回部

上諭軍機大臣曰雅爾哈善等奏庫車賊首阿卜都克勒木逃竄餘衆出降是賊人出入自如尚得云

兵力攻取乎且得城後即應進兵乃又候順德訥
追賊回營則將軍及叅贊大臣所司何事雅爾哈
善不堪任使至於此極可傳諭兆惠作速領兵前
進此時順德訥果擒獲阿卜都克勒木尚可贖罪
若仍前支吾粉飾著兆惠訊明從前疎脫霍集占
屬實即於彼處正法或有別情即與雅爾哈善哈
寧阿一同拏問派妥員押解來京朕親訊情節至
霍集占曾有再來救援之誓迄今杳無聲息可見

逆賊計窮力竭以致衆人解體大軍所臨惟有子
身遠遁更有何能兆惠惟以雅爾哈善為戒堅心
進勦一切機宜不必專候指示所留綠旗丁四千
名現在攻取回城正需分守且可助大兵聲勢不
必遣往屯田又

諭曰伯克托克托署守脩馬英德筆帖式官住初至
庫車即為賊誘害深可憫惻托克托散秩大臣職
銜令伊子塞第克承襲馬英德官住著交部照陣

亡例議卹兆惠即傳諭官兵等知之

諭定邊左副將軍成衮扎布辦理烏梁海事宜

上諭軍機大臣曰據成衮扎布奏稱歸附之烏梁海等每自言如山獸河魚任意行走難以嚴加管束大凡有命者無不貪生若順其性則不勞防範且省備兵籌餉之費等語烏梁海恩克阿喇善等脫逃本非大事成衮扎布如此陳奏未免過慮從前扎隆阿等奏到時朕於行在詢問總管圖布慎據

奏二人不過生計稍窘欲歸舊游牧因論圖布慎
爾如欲歸游牧亦聽其便而伊懇陳不願看來並
非飾詞况察達克一聞恩克等脫逃即行追緝是
舊烏梁海等久循法令本無可疑其妄動者不過
一二新降之人若因此并謂舊人俱不可信豈情
理耶總之駕馭此輩原不必過於防範伊等安靜
謀生則撫慰之若叛逃滋事則擒剿之而已可傳
諭成衮扎布知之

已卯

申諭定邊將軍兆惠以雅爾哈善為戒

上諭軍機大臣曰昨以雅爾哈善情罪諭知兆惠令其拏解來京今覆閱伊等奏摺愈為可恨即如阿卜都克勒木以四五十騎遁去城內降人共三千餘口此言即屬可疑伊黨與若止此數則我以八千人圍城應早生內變亦何難剿殺無遺且得城後回衆獻出助惡之沙泥雅斯等五人遂俱正法

此五人若果為阿卜都克勒木死黨則豈肯舍之而去致坐受老弱之擒獻此中情節豈復可問況納降既定雅爾哈善仍未入城但令哈寧阿前往看視而屢次奏報從未有身親其事者又焉用將軍為也試數用兵以來膺專閫之寄有似此因循疎懈者否兆惠當以為戒奮勉前進現在已至何處彼處情形若何作速奏聞

宣諭雅爾哈善罪狀

上諭大學士曰雅爾哈善進兵庫車屢次失機貽悞
前已降旨宣諭矣今據奏庫車賊首阿卜都克勒
木率衆夜遁所餘老弱出降現在順德訥往追俟
回營時再行進兵等語以八九十官兵駐守三月
之久俟賊首逃去城中窮蹙出降始得其城雅爾
哈善其尚何顏以得城奏報耶辦理回部一事從
前因逆賊霍集占等係我兵平定伊犁時出諸厄
魯特拘禁之中俾仍長舊地而狼子野心旋復戕

害我副都統阿敏道負恩肆逆不得行勦滅而
雅爾哈善在巴里坤辦理沙克都爾曼濟一事頗
能乘機奮勉是以屢加優擢今春進兵即授為將
軍伊既膺討逆之任自應倍加勇往以擒獲叛賊
為務詎意懈弛債事竟有出於意料之外者前此
霍集占親率賊衆來援庫車屢經挫衄乃既不能
擒獲於臨陣復不能覺察於入城一任其潛入潛
出並無措置而徒以堵截之責委之順德訥而已

不預至掘城一事用綠旗繆計復全聽之馬得勝
轉致為賊所覺橫開一溝傷我兵卒種種坐失事
機以如許兵力圍一彈丸之城而賊首出入自如
不知統兵大帥身在何處朕彼時觀其情形怠玩
若此早知庫車城中為賊腹心拒守者必將盡行
狡脫僅餘老弱而後得之當即屢降諭旨令其加
意防守勿致逃逸今觀所奏庫車頭目阿卜都克
勒木領衆夜遁惟餘老弱出降一一不出所料可

見雅爾哈善於霍集占脫逃時不親往追擒馬得
勝掘城時又不能躬行相度又回衆出降尚不入
城查閱亦不急行進剿數月以來惟事坐守軍營
老師糜餉直待賊人兔脫鼠竄相率盡出而後得
一空城以報命且忝為大師不能身先士卒致一
切措置遲悞盡以委之他人初無一語引罪但知
高坐帳中以郵符奏報自任若代他人傳述者則
雖芻靈木偶皆可勝任何必復簡用將軍為哉今

雖得庫車而城中所存率係饑疲殘廢轉須為之
養贍即得城亦復何用且伊奏內沙喇斯瑪呼斯
等厄魯特及自伊犁逃歸回衆所有男丁不過一
千餘名設賊黨果止此數豈能拒守如許之久又
稱回衆供出沙呢雅斯等五人訊明正法此五人
者既係阿卜都克勒木惡黨能鈐制諸人不令出
降即何難與之同竄而必坐以待斃所奏荒唐悖
謬如此謂無欺飾情弊其誰信之核其前後情罪

從來悞事之臣未有若是之甚者夫賞功罰罪國
有常典雅爾哈善前辦理沙克都爾曼濟時朕以
其奮勉可嘉即授為內大臣并將伊子補授侍衛
今乖謬失律至此雖欲為之曲貸其如國法何已
降旨兆惠等將伊拏解來京治罪伊子並著發往
黑龍江當差朕於諸臣功罪毫無成見惟有信賞
必罰以彰憲典而已將此通行傳諭知之

辛巳

叅贊大臣富德疏奏招撫布魯特情形

富德奏言臣與巴圖濟爾噶爾瑪常額爾登額等領兵七百名於七月初六日至布魯特之塔拉斯其頭目邁塔克哲野木又喀喇博托之弟喀喇們都子阿薩木及分管三百餘戶之納蘇卜呼里俱來求見言及侍衛托倫泰招撫情事臣詢以西哈薩克相距程期據云邊界相錯有十數日數日不等西哈薩克之特柳克圖里拜

等年來與塔什罕回人相攻不知勝負若何請遣人為大兵前導臣派三等侍衛蒙古勒岱吉林署叅領赫申等前往西哈薩克查拏哈薩克錫喇若特柳克等情願歸誠遣使入

覲即照例伴送至京又詢邁塔克等云從前圖魯起等告稱塔拉斯有三鄂拓克今惟科索楚啓台兩處其薩婁鄂拓克之阿克拜何以未來據稱阿克拜及伊姪車里黑葉里黑等三人分管五

千戶又愛達爾伯克管百餘戶相距頗遠且與
回人額哲伯特相攻故前此未導侍衛前往今
阿克拜過夏之地去此只四五日程期等語臣
即令邁塔克遣人前導派察哈爾藍翎侍衛伊
達木扎卜戴獎賞藍翎之索倫領催林保等前
往十二日伊達木扎卜等回營告稱阿克拜等
所居名巴倫古特聞有

恩旨招撫俱歡悅歸誠阿克拜年老遣其子伯勒克

愛達爾伯克有疾遣其弟諾奇等來見請與邁
塔客子弟同行入

覲臣令其隨營於十三日起程前往西哈薩克邊境
計蒙固勒岱等八月初可回其哈薩克錫喇有
無潛匿及西哈薩克果否歸誠或伊等請來年
入

覲則阿克拜等使人令且回游牧臣於八月內可抵
伊犁等處奏入

上諭軍機大臣曰富德已至塔拉斯將抵西哈薩克
邊界索取哈薩克錫喇但哈薩克錫喇係額爾類
舊屬去年在沙喇孛勒曾相通問已屢諭向額爾
類索取著傳諭策布登扎布富德仍遵前旨辦理
至回抵伊犁時若能由特穆爾圖淖爾直抵葉爾
羌喀什噶爾更善否則徑往阿克蘇與兆惠會合
協力擒獲霍集占以奏膚功

壬午

命布政使銜德舒駐劄庫車辦事

上諭軍機大臣曰現在已得庫車城大兵向前進發
應照巴里坤之例特派大員駐劄德舒在哈密辦
理健銳營兵起程後著即前往庫車駐劄辦事其
協同阿里衮在巴里坤辦事著清馥前往

命侍郎書山辦理屯田事務

上諭大學士曰永貴効力軍前已閱數年自應更換
書山著以侍郎銜同定長辦理屯田事務刑部侍

郎員缺著永貴補授

平定準噶爾方略正編卷六十

欽定四庫全書

平定準噶爾方略正編卷六十一

乾隆二十三年九月甲申朔

獎諭定邊將軍兆惠

上諭大學士曰據兆惠奏稱遵旨令伊前赴庫車察看情形再行回京當即領兵八百名速進一抵庫車即與雅爾哈善協心勦賊斷不肯半道回京有覲顏面等語所奏肫誠勇往深得領兵大臣之體

軍旅為國家重務以滿洲大臣身膺簡畀統率戎
行正當踴躍自効公爾忘私我朝簡策所垂忠勤
代著遠軼前古乃近來漸染惡習或至因循選懦
臨事心懷觀望或聞撤兵慶若更生曾不知奉公
體國之義謂何此風深可痛恨朕慎守國憲不得
不力為整頓今兆惠奉到前次回京之旨不肯苟
且了事毅然以勦賊自任其器識實出諸臣之右
且計其具奏時並未知有雅爾哈善失機愆事不

堪任用令伊往代之旨乃如此陳奏豈揣摩而得者朕方幸得一急公任事之大臣深為嘉悅彼畏首畏尾之徒聞此而不愧汗交集其何以自列於臣子耶兆惠著加恩賞戴雙眼孔雀翎以示優獎朕於諸臣賞功罰罪一本至公毫無成見惟在諸臣之自取耳著通行傳諭知之又

諭軍機大臣曰兆惠奏稱現在領兵一千擇其馬力有餘者八百名前往回部餘俱由烏魯木齊遣回

游牧等語前因索倫察哈爾等兵在西路軍營年久已降旨派撥更換今據奏軍營兵丁又復前往回部是今歲不能即回游牧著加恩再行給賞一次其發回兵丁由烏魯木齊巴里坤肅州資送至京再回游牧著傳諭永貴阿里衮黃廷桂等照例辦理

定邊將軍兆惠疏奏擒獲賊黨衛諾克正法

兆惠奏言臣等派副都統溫布侍衛扎延保領

兵搜捕逸賊據報署叅領哲野勒圖等詢知輝
特台吉巴圖宰桑多木布綽和爾宰桑衛諾克
等百餘戶在阿勒坦呼斯坦游牧七月十八日
行至其地遇賊百餘人據山結壘官兵奮擊賊
始奔竄擒獲多木布之妻供稱伊夫被殺巴圖
棄其幼女潛逃衛諾克向阿勒坦呼斯坦嶺逃
去溫布因馬蹶傷脰伊子格森泰肩脇被鎗傷
重身故令扎延保等往追將衛諾克擒獲計勦

賊百餘人臣等擬於前往回部時便道搜捕其
哲野勒圖奮勉出力已給與備賞孔雀翎所有
得功官兵及陣亡得傷者應請

旨交部酌量議叙議卹查衛諾克曾蒙

恩授以侍衛職銜乃附和昂吉岱等拒守又為賊糾
合黨衆罪不可逭因其傷重即行正法奏入得

旨溫布勒毅輝特綽和爾等鄂拓克賊衆奮勉効力
著賞銀一百兩伊子格森泰受傷身故著加恩賞

給世職令伊孫承襲其効力及陣亡得傷官兵俟
兆惠冊報時該部即照例議叙議卹

乙酉

諭辦理屯田侍郎永貴等查核收成分數

上諭軍機大臣曰據永貴奏稱將兆惠所議屯田收
成分數每人墾田二十五畝所收穀石可給八九
人之食詢問官兵等俱稱必係成熟之地一家有
四五人助力方如前數若一人墾田即盡力不過

十四五畝可食三四人等語此特據綠旗官兵等飾說遂以為實不但與兆惠所奏不符即以內地情形而論四民之中農居其一尚能積貯有餘流通出糴永貴等豈未聞知或因初墾之地收成歉薄若將來由近及遠以漸增加仍執此定數安足以給軍食可傳諭永貴等加意勸課兵丁務如農民治田不留餘力視其所收分數再行定議具奏諭定邊右副將軍策布登扎布等暫回游牧休息

上諭軍機大臣曰昨諭策布登扎布富德擒獲哈薩克錫喇回抵伊犁即取道前往阿克蘇今思辦理回部已有兆惠納穆扎爾等自易竣事策布登扎布在軍前効力年久撤兵後即回游牧休息來年再至熱河扈從行圍郡王品級羅卜藏多爾濟効力有年亦著回游牧富德仍遵旨前赴兆惠軍營

丙戌

上幸木蘭行圍

駐蹕布扈圖口布魯特使臣車里克齊等來朝

賜宴

命扈從王公大臣等皆預宴

上以西域諸部降附來朝自乙亥丁丑戊寅三年皆
適會於布扈圖口地靈佳兆若有神異

賜名曰伊綿峪

命更代軍前侍衛等回京

上諭軍機大臣曰侍衛瑪瑞圖倫楚等軍前効力年

久自應更換現在派送牛馬之侍衛瑚什科普薩
額爾登額蒙郭勒等至巴里坤交收後阿里衮即
照例給與整裝銀兩令其前赴兆惠軍營兆惠酌
將軍前侍衛似瑪琿圖倫楚行走年久者揀選四
五人調回京師其員缺即以瑚什等補用

命內閣學士五吉馳驛前往哈密隨同吳達善辦事

己丑

以雅爾哈善奏報情節

申諭定邊將軍兆惠

上諭軍機大臣曰雅爾哈善奏稱領兵至賽里木正值麥熟現在速行收穫候兆惠信息即前往阿克蘇等語所奏更為不解此時前途禾稼被野何處不可取給自應領兵速進而量留後隊收穫以裕軍食所得豈不更多但伊等業已如此朕亦不復諄諭可傳諭兆惠速將雅爾哈善拏解來京前曾降旨以順德訥若擒獲阿卜都克勒木尚可寬宥

今既不能自應治罪如已遵旨正法則已否則一同拏解派德爾森保沿途防送不可致令自戕又據奏拏獲固原逃兵等訊係馬得勝所轄而專管之把總宋林匿不稟報等語馬得勝失機僨事罪不可追著與把總宋林俱於軍營正法綠旗陋習最宜整頓兆惠其留意辦理又

諭曰閱雅爾哈善所奏各摺全無端緒即如把總周彥恒因攻取庫車被鎗落水所攜礮位亦同沈溺

為賊所得適游擊伍靈阿被傷未曾稟報克城後
回人等獻出礮位始補行叅奏不思礮位若果倉
卒遺失自不妨即時稟報大槩因遇賊退怯遂為
所奪及回人獻出知不可隱始行舉首耳總兵五
福遊擊伍靈阿俱著交部嚴加察議仍著兆惠查
訊明確具奏又所奏遣厄魯特侍衛察罕庫本通
信兆惠豈軍前侍衛無一可用且即遣德爾森保
亦何不可之有數年用兵以來將軍大臣如策楞

玉保等雖經獲罪未有如雅爾哈善之甚者所奏已無庸批示可錄寄兆惠閱看當深以為戒仍將現至何處情形若何作速奏聞

庚寅

以詢問疎脫霍集占情形

申諭定邊將軍兆惠

上諭軍機大臣曰護軍校瑚圖禮解送伯克阿里來京朕詢以霍集占入庫車城將軍等果否聞知及

逃脫時作何辦理據奏六月十六日霍集占敗走時雖見有賊蠹入城實不知為何人及收兵後衆人即傳說霍集占入城之信且平日賊衆不敢出戰而入城次日即分路衝突衆人益以為實隨經伯克鄂對請於鄂根河增兵堵截迨霍集占夤夜逃出時侍衛噶布舒報知順德訥而順德訥必俟天曉往追賊已據橋斷後等語是疎脫霍集占實順德訥之罪然雅爾哈善哈寧阿等並未親身督

戰惟恃一順德訥所司何事况鄂根河堵截之兵
鄂對已經籌及何以疎懈如前令賊得先為之備
愈可憤恨雅爾哈善等情罪俟拏解來京時再行
研訊可傳諭兆惠以朕詢問軍前情節始知額敏
和卓鄂對等盡心効力深用為慰特予嘉獎用示
鼓勵其雅爾哈善等辦理乖繆之處或有續行查
出者亦即奏聞

叅贊大臣富德疏奏右部哈薩克圖里拜及塔

什罕回人圖爾占歸誠

富德奏言臣等遣蒙固勒岱赫善等前往右部
哈薩克索取哈薩克錫喇又聞塔什罕回衆與
石部哈薩克相攻令其曉示息兵同來歸附臣
就近進兵距莽格特城兩站駐候七月二十四
日蒙固勒岱等報稱詢知右部哈薩克頭目圖
里拜輝格勒德薩薩克拜等俱在塔什罕城與
回人爭戰特柳克已經病故伊子雅木巴拉克

游牧亦相去不遠隨傳喚到營詢知薩薩克拜
等所在亦率四十餘人來迎據稱右部哈薩克
係阿比里斯汗為首其塔什罕係莫勒多薩木
什沙達圖爾占分管惟圖爾占與哈薩克爭戰
七月十三日薩薩克拜引導與阿比里斯等相
會問以哈薩克錫喇踪跡俱稱不知須候圖里
拜來時商議十五日見圖里拜十六日阿比里
斯等集衆來見告稱我右部薩薩克久欲歸誠

因被準噶爾隔絕今聞大兵平定準噶爾我左
部哈薩克阿布賚歸誠受

大皇帝隆恩又聞布魯特相繼歸附我等欣聞招撫
情願入

覲因年老不能遠行議遣圖里拜之子卓蘭輝格勒
德之族弟博索爾瑞代往謹

進馬三匹並叅贊大臣贊見馬一匹等語隨於備
帶緞疋內分別給賞仍示云爾等已經歸誠尚

與回人爭戰不如乘此解散據圖里拜告稱與
塔什罕回人向無嫌隙因圖爾占逐我所用伯
克莫勒多薩木什是以交惡今情願息兵遂遣
索倫領催圖魯遜吉林領催留保馬甲額森特
德赫布等二十一人前往正值哈薩克塔什罕
之衆拒河排列爭水放鎗於是高聲宣諭大國
使臣特為息汝等爭鬪而來因為陳說利害喚
出圖爾占與圖里拜相見伊等亦情願自此息

兵一同歸順

大皇帝其回人等仍舊供哈薩克賦役至水道仍給
與塔什罕圖爾占不勝感激議定遣人入

覲遂帶領哈薩克所遣之卓蘭博索爾瑞莫勒多薩
木什所遣之默泥雅斯前來其圖爾占使人尚
未曾到看得右部哈薩克及塔什罕事務俱係
圖里拜辦理等語二十九日所遣使人來至軍
營臣詳悉曉示並將護送來京之官兵跟役酌

量派調又蒙固勒岱等在莫勒多薩木什處查出阿睦爾撒納親兄巴特瑪車凌之子伊什扎卜一併交蒙固勒岱等沿途看守於八月初四日起程赴京所有圖里拜等奏章謹齎呈

御覽奏入得

旨富德久在軍營奮勉効力今又招撫西哈薩克著加恩交部議叙給與世職蒙固勒岱赫善等俟帶領來使入覲時再加恩賞所有從行官兵著富德

酌量加賞有應行議叙者即造冊送部尋

命譯進圖里拜等表文其文曰右部哈薩克臣圖里拜等跪奏

大皇帝伏念臣者久思內附遠處邊末與左部阿布賚各長一方為準噶爾阻絕末由自通近聞左部輸服被

恩優渥恭惟

天使惠來祇領

宸訓得均隸臣僕誠歡誠忭謹遣臣子弟卓蘭等入
覲瞻仰

天顏如天覆育之

聖人在上臣願竭衰駑奮勉自効永無二心倍於左
部伏祈

睿鑒又莫勒多薩木什表文曰塔什罕回人臣莫勒
多薩木什跪奏

大仁至聖普昌羣生大皇帝伏惟

天使惠臨臣土臣等不勝歡躍奉承

諭旨願為臣僕所有買得之厄魯特伊什扎卜亦願

獻

闕下謹遣臣弟恭聆

聖諭回歸游牧宣示臣等全部但恐陳奏之詞不能

達意實深惶悚謹奏奏入俱得

旨下部知之

前鋒校瑚圖禮以解送回人伯克阿里至京

授藍翎侍衛

辛卯

上駐蹕烏蘭哈達布魯特使臣舒庫爾來朝

賜宴

命扈從王公大臣等皆預宴

諭定邊右副將軍策布登扎布等索取哈薩克錫喇

等事宜

上諭軍機大臣曰昨據富德奏報西哈薩克部落歸

誠詢無哈薩克錫喇信息前聞哈薩克之額爾類
曾與交通已屢諭向彼索取計此時富德策布登
扎布俱陸續前往如哈薩克錫喇實在額爾類處
萬一遲延不行縛獻即先示以進兵搜捕若仍復
支吾不妨耀我軍威務期擒獲但信息稍有不實
仍宜酌量不可輕舉滋事至伊等行糧最關緊要
策布登扎布既經行文永貴若業已運送即與富
德通融接濟再成袞扎布奏稱烏爾都里克臺站

牲隻被賊搶奪其踪跡向阿勒坦額默勒前去等語策布登扎布等回兵時當留心搜捕毋致漏網侍衛上行走烏爾登託倫泰帶領布魯特使人等來京

授烏爾登仍為三等侍衛託倫泰為藍翎侍衛

士辰

諭都爾伯特親王策凌烏巴什等協心辦理游牧上諭軍機大臣曰朕念已故都爾伯特汗策凌抒忱

効力加恩准伊子索羅木衮布襲汗名號仍授為
盟長但盟長辦理全部事務所係甚重聞伊襲封
以後時有疾病今授伊弟巴桑為副盟長巴桑亦
係年少恐未更事親王策凌烏巴什貝子瑪什巴
圖等誼關同族自應視如一體可傳諭伊等悉心
協助加意辦理不可存彼我之見

癸巳

定邊將軍兆惠疏奏起程日期

兆惠奏言臣於八月十九等日奉到節次

諭旨以雅爾哈善等攻圍庫車失機債事令臣速往
辦理臣前於古爾班濟爾哈朗途次得協助雅
爾哈善之

旨已於本月初九日起程此時雅爾哈善應已攻取
庫車前抵阿克蘇臣擬進兵夾攻行至阿勒坦
呼斯坦嶺雪盛路險臣與官兵等牽馬步行兩
晝夜現在領兵四百名輕騎先進近據雅爾哈

善遣來厄魯特侍衛察罕庫本告稱本月初六日已得庫車霍集占收集餘衆不過戀守巢穴豈能遠遁若雅爾哈善未得阿克蘇臣即作速攻取直抵葉爾羌喀什噶爾務擒霍集占中途所得各城以綠旗官兵駐守至臣受

恩深重屢蒙寬宥即如濟爾哈朗之圍若非

聖主督勅應援早已破賊戕害中心感激無能報稱何敢稍存家室之思乘此軍聲大振各城回衆

膽寒惟期大功速竣凱旋京師事

君養親永承

恩澤奏入

上諭軍機大臣曰兆惠奉到辦理回部諭旨奮勉前進立志可嘉應無難擒獲逆賊但所奏霍集占不過逃往喀什噶爾朕意逆賊未必如此或仍在阿克蘇等處觀望此時計納穆扎爾三泰亦將會合兆惠惟傾知霍集占所在并力圍剿而分兵招撫

諸城告以霍集占窮蹙不日就縛爾等脅從之衆
降者無罪賊黨離心成功自速頃據吳達善奏稱
自哈密運糧至闢展每石運費六兩三錢有奇等
語較之自歸化城運至烏里雅蘇台雖減三分之
一然以肅州至庫車計之則更覺加增可見僱值
甚昂兆惠宜收獲回人穀石加意撙節以省內地
供億之勞俱著傳諭知之

諭護軍統領努三等酌量守候哈薩克貿易

上諭軍機大臣曰現在時屆季秋哈薩克貿易人等
久應到來迄今尚無信息不便在彼守候著豫備
貿易人等各回原處努三仍暫時駐劄如哈薩克
人等到來而我豫備貿易者歸程未遠亦可喚回
若為時既久努三即令臺砮人等於哈薩克經過
時以伊等行走遲滯有渝定約致商人不能守候
委曲曉示即與永德同往庫車在兆惠軍營行走

甲午

議備勦官兵就近支餉事宜

甘肅巡撫吳達善奏言准永貴咨阿里衮移送
奏摺內稱派往軍營之索倫察哈爾官兵由阿
濟必濟前往烏魯木齊自該處給於口糧查本
處向未承准廷寄即當據咨速辦但哈密巴里
坤運到糧石俱在闕展距烏魯木齊九砵需駝
甚多應於哈密所僱商駝加價轉運但商人等
憚於遠行必派官兵約束今屯田正當收穫應

請另行選派又運糧商駝若本處遽行截留未免口糧不足且亦無項可動等語臣即行咨明阿里衮嗣據覆稱巴里坤駝隻存剩無多商民車驟亦不常有今哈密糧運往來又有夾山一路較為便易應聽酌量辦理等語查哈密運送闢展糧餉約萬餘石令官兵等兩月口糧只一千六七百石應請即於闢展截留運糧駝隻送往烏魯木齊其口糧草豆亦於闢展借給臣又

解銀一萬兩交與永貴以充僱值仍俟阿里衮
派出官兵遣赴闡展護送糧運奏入得

旨軍機大臣速議具奏尋議此次索倫察哈爾官兵
原議派往烏魯木齊再赴庫車因該地有哈薩
克貿易馬匹一事必須照管今貿易人等尚無
信息自應以進勅回部為要若紆道烏魯木齊
則兵丁無事遠行虛糜運費應請行文永貴將
官丁口糧即令在闡展支給徑往回部一面行

文領兵副都統福祿等由阿濟必濟就近前往
闢展支給口糧奏入

上諭曰覽吳達善所奏伊與永貴阿里袞互相推諉
情節顯然況從前令派出官兵前往烏魯木齊係
照彼時情形酌定永貴等身在地方自當就現在
機宜通融籌辦且如兵丁等行走兩月餘即已到
烏魯木齊再多行九站至闢展裹帶口糧有何不
可以多行數日之故紛紛文移往復互相推諉並

不從公事籌畫而各為其身計近來大臣辦事往
往如此永貴阿里衮吳達善俱著傳旨嚴行申飭
永貴係承辦之人尤為非是著將軍機大臣所議
交永貴等遵照辦理前因永貴在軍營有年派書
山往代恐伊初到不諳事體永貴不必急於來京
俟辦理軍務竣事再行請旨

丙申

雅爾哈善等疏奏阿克蘇回衆乞降

雅爾哈善等奏言八月二十日卡倫侍衛奎瑪
岱等送到阿克蘇回人圖拉克圖拉克拜呈獻
頭目摩羅阿舒爾等降文隨將來文譯出云謹
呈

天朝領兵將軍等自阿克蘇城之摩羅阿舒爾阿琿
等及管領千人之伯克大小共聞數年來霍集
占凌虐回人勉聽役使今大兵來臨正我等之
幸昨因與霍集占離隔以致被攻若大兵不來

必遭其害為此謹呈等語臣等獎以言語給以飲食詳加詢問據稱霍集占從庫車逃往阿克蘇時將拜城回人移往和闐烏什復集葉爾羌等處回衆三千五百合阿克蘇烏什之衆一千起程向賽里木再援庫車伊之哨探人等望見大兵行塵報知霍集占頗為惶恐領衆回阿克蘇暫駐欲將阿克蘇回人亦移往烏什久皆閉城不從霍集占怒於本月十七日率衆攻城城

中放鎗拒敵殺十數人用事之伯克瑪瑪第畢里野木亦在其內霍集占逃往烏什等語臣等撫慰圖拉克給以印文令其先回又卡倫侍衛達克塔納送到阿克蘇回人瑪瑪特呼里稱係總管色梯巴勒氏一族隨經識認據稱霍集占乘怒殺瑪瑪特呼里之兄弟三人伊以逃避獲免乞降屬實臣等派兵五百名令端濟布等同伯克鄂對等於二十一起程本日據遣往兆

惠軍前之厄魯特侍衛察罕庫本同兆惠遣來
侍衛成果到營告稱兆惠於二十六日可至拜
城其期成事奏入

上諭軍機大臣曰阿克蘇回人當霍集占敗逃即已
閉城拒敵斯時雅爾哈善若早為進兵不特回城
久已降附而逆賊方與回衆爭鬪乘機勦殺即擒
獲亦未可定此次乞降豈雅爾哈善之力可傳諭
兆惠仍遵前旨將雅爾哈善拏問看來回衆俱懷

二心我兵所至自必相繼迎降兆惠其迅速前進
遵照節次諭旨奮勉辦理又

諭曰雅爾哈善遣赴兆惠軍前之厄魯特侍衛察罕
庫本行走甚為迅速著傳諭兆惠查伊現在侍衛
等次加陞一級俟軍務告竣將伊戶口查出令其
完聚安插

命叙卹郡王車木楚克扎布所領得功陣亡被傷官
兵

上諭軍機大臣曰據扎隆阿奏稱郡王車木楚克扎布往追恩克沿途勒殺賊衆看恩克踪跡渡哈屯河藏匿原游牧亦未可定請暫回吹阿勒和碩支給口糧俟冬季雪後追捕等語車木楚克扎布甚屬奮勉即照伊所請辦理所領官兵內有得功及陣亡被傷者查明酌量送部議叙議卹

丁酉

申諭定邊將軍兆惠等會兵速平回部

上諭軍機大臣曰現在阿克蘇城已經歸附看來各城自必相繼迎降可傳諭將軍納穆扎爾叅贊大臣三泰帶領索倫察哈爾及健銳營官兵之副都統福祿侍衛訥齊訥豐安等速行前進與兆惠會合仍諭永貴等將官兵糧餉速為辦給既合兩路大兵又益以三隊勁旅聲勢倍加雄壯回衆聞風震懼今歲可考成功朕佇待伊等捷奏兆惠專膺閫寄其率先奮勉以副睦懷又

諭曰昨以阿克蘇乞降諭布魯特使臣等據奏波羅
泥都霍集占等從前得脫回巢以阿卜都薩亦為阿克蘇
葉爾羌伯克其長子阿卜都薩塔爾亦為阿克蘇
伯克等語查雅爾哈善原奏無阿卜都薩塔爾之
名摩羅阿舒爾等是否將伊殺戮及拏獲送京兆
惠即查詢具奏

戊戌

諭大學士管陝甘總督黃廷桂等辦給口糧駝隻等

事宜

上諭軍機大臣曰據黃廷桂奏稱踏勘運糧道路若由巴里坤有博爾圖等處山徑險阻車不能行等語大兵進勦糧運攸關緊要但昨據雅爾哈善奏軍行已至賽里木計田野收穫可得七千兵三月之糧尚不至窘迫可傳諭黃廷桂軍營糧餉固宜陸續接濟亦不必過於張皇既據稱哈密一路可以運往祇須酌量情形源源轉運又所奏塔勒納

沁試種豌豆已有成效塔勒納沁既可種豆由此
推之闢展吐魯番托克三烏魯木魯等處想皆可
以試種若得成熟於牧養更為有益可傳諭永貴
等將闢展等處節候地氣測驗確實即於明春佈
種所需籽粒即向黃廷桂咨取照數辦給又

諭曰黃廷桂奏於安西甘肅各營孳生駝隻內揀得
四百有奇送往哈密巴里坤應用現在供應大兵
尚無貽誤俟直隸山西購解到日即行揀送等語

看來所有駝隻祇足遞運糧餉器械而進勦兵丁則不敷派撥是以黃廷桂請於官兵額支馬匹外再給駝馬一匹此次進勦回部沿途城堡可居非若與準噶爾等野戰必須馱載帳房器什也況回人等乞降相繼官兵到彼自可立奏膚功尤應輕裝速進以從便捷領隊大臣侍衛等至闕展支給馬匹不必拘泥成例俱著傳諭知之

諭定邊將軍兆惠豫籌駐防事宜

上諭軍機大臣曰覽黃廷桂奏摺有將來平定回部
仍應駐兵之語於回地情形尚未深悉回部與伊
犁不同伊犁入我版圖控制遼濶不得不駐兵彈
壓至回部平定後不過揀選頭目統轄城堡總歸
伊犁軍營節制即從前準噶爾之於回人亦祇如
此可傳諭兆惠將來辦理回部惟於歸順人內擇
其有功而可信者授以職任管理貢賦等事具奏
請旨至伊犁則必需大兵駐防現在作何籌畫且

由近及遠以次屯田俱著於平定後一併詳悉妥議具奏其駐防伊犁大臣卽兼理回部事務

己亥

命賞給都爾伯特貝勒等銀兩

上諭軍機大臣曰此次隨扈木蘭之都爾伯特貝勒巴桑貝子額爾德尼各賞銀二百兩貝子奇塔扎薩克台吉策登策伯克各賞銀一百五十兩扎哈沁公扎木禪烏梁海散秩大臣圖布慎各賞銀一

百兩總管莽噶拉克賞銀五十兩都統和通賞銀三十兩

辛丑

命暫寬刑部侍郎永貴等議處

上諭軍機大臣曰永貴等追捕盜竊車需賊人未能擒獲因命交部察議經該部議以分別降革但伊等委員擒拏竊賊未獲尚非軍營失機可比永貴著帶所降之級仍留刑部侍郎任定長納世通現

辦屯田事務若照部議革任及帶所降之級留於
軍營恐不足資彈壓著仍以現在品級辦事俟事
竣回京該部再行請旨

壬寅

諭分派辦理屯田事務大員

上諭軍機大臣曰前以永貴在軍營年久命書山前
往更換今因屯田漸次開闢添派副都統滿泰舒
景阿二員可傳諭永貴等將現在屯田酌分兩處

滿泰與書山為一處舒景阿與納世通為一處以
便稽察以專責成永貴起程時將印信交與定長
所有兩處屯田事務令其總理

平定準噶爾方略正編卷六十一